

繡刻青衫

記定本

目錄

第一齣 家門始末

第二齣 元白揣摩

第三齣 裴興私歎

第四齣 蠻素餞別

第五齣 元白上路

第六齣 元白對策

第七齣 郊遊訪興

第八齣 蠻素聞捷

第九齣 河朔兵亂

第十齣 夢得刺江

第十一齣 承璀授閫

第十二齣 河朔交兵

第十三齣 贖衫避兵

第十四齣 抗疏忤旨

第十五齣 興遇蠻素

第十六齣 訪興不遇

第十七齣 茶客訪興

第十八齣 樂天赴任

第十九齣 裴興還衫

第二十齣 遣迎蠻素

第二十一齣 蠻素邀興

第二十二齣 茶客娶興

第二十三齣 蠻素至江

第二十四齣 娶興人至

第二十五齣 樂天賞花

第二十六齣 劉白謁元

第二十七齣 興拒茶客

第二十八齣 坐溼青衫

第二十九齣 裴興歸衙

第三十齣 樂天蒙召

青衫記

明顧大典著

第一齣 家門始末

〔看花回〕〔末上〕屈指勞生百歲期。榮瘁相隨。名牽利綰逡巡過。奈兩輪玉走金飛。紅顏成皓首。極品何爲。塵事常多雅會稀。忍不開眉。畫堂歌管深深處。難忘酒盞花枝。醉鄉風景好。攜手同歸。

〔謝池春〕白氏樂天。初與微之交好。學揣摩時時傾倒。春雷蟄起。上林鶯曉。應制科同登廊廟。得意郊遊。邂逅裴娘年少。典青衫恨相逢欠早。誰知交頸化作分飛鳥。直待潯陽江上。聽琵琶方成諧老。

金石交夢得微之。

鶯花侶小蠻樊素。

白樂天詞賦無雙。

裴興奴琵琶獨步。

第二齣 元白揣摩

〔高陽臺〕〔生上〕吞吐虹霓。氤氲豹霧。文場旗鼓森列。東壁圖書。東山琴酒雲月。含章未展經綸手。志空懷伊呂功烈。且從容芸牕麗澤。待時而發。〔鷓鴣天〕當年安石著英聲。近代長庚嗣美名。前輩風流誰可擬。依稀指點屬狂生。營竹帛。翼丹青。烏兔催人夢暗驚。自信儒冠不相誤。毛錐豈肯負生平。自家姓白。名居易。字樂天。本貫下邳人也。早年失怙。常懷風木之悲。壯歲鼓盆。久虛琴瑟之樂。止有侍兒小蠻樊素。可侍琴書。竊比謝氏。明月白雲。每隨杖履。我交厚。只有劉君夢得。元子微之。劉已早入仕途。元亦同叨桂籍。他才高倚馬。志許攀龍。結髮成膠漆之堅。同心締金蘭之契。晤無虛日。談卽連牀。昨日許我早過齋中。共勤揣摩之業。以爲進取之資。爲何此時還不見來。白璧那裏。〔末上〕書當快意讀易盡。客有可人期不來。相公有何分付。〔生〕你看元相公到來。卽便通報。〔末〕曉得。

〔生查子〕〔小生上〕草屈子雲玄。談卷君卿舌。坐嘯樹勳猷。方顯人中傑。自家元稹是也。因與白樂天相期。今日特來赴講。可通報。〔末報介〕生迎見介生。微之請坐。微之豈不聞君子藏器待時。以文會友。小弟嘗閉戶累月。揣摩當代之事。造成策目七十五門。今日特請微之過來。撮

其要旨。講論一番。庶麗澤不虛。藏修有待。不知尊意如何。〔小生〕如此甚好。願聞願聞。

〔高陽臺〕〔生〕藩鎮縱橫。朝綱解紐。正澄清攬轡時節。建立何先。賢豪須有施設。顛越道傍築室。猶未決。笑蘇張漫勞饒舌。倘遭逢。弛張戰守。早權優劣。

〔前腔〕〔小生〕明哲謀斷兼資。昔推房杜。而今付之空說。國是盈庭。雌黃未有分別。迂闊依違廟堂。無石畫。歎君門萬里懸絕。運嘉謀。只愁阻隔。未能直達。〔生〕一向言路不開了。

〔前腔〕差迭言路當開。直臣應獎。須知帝裾難絕。自林甫奸邪。把忠賢視同吳越。悲咽九齡已老。韓休死。仗馬鳴杜鵑啼血。到如今。滿朝鉗口。百僚結舌。〔小生〕如今內無直臣。外無戰將。

〔前腔〕員缺推轂宜精。建牙當選。豈容債帥星列。二卵棄干城。把膺揚付之彈鋏。崩塌汾陽薨逝。西平殞。有誰人奉公竭節。到如今。虎臣矯矯。化爲蛇蝎。

〔尾聲〕揣摩世故。須英傑。整頓乾坤。莫浪說。正好切磋。休玩愒。〔生〕微之。聞得外

面應試的。也有起身去了。我們且待春明。打點上京取應便了。〔小生〕小弟就此告辭。

男兒事業在三餘。

學就須乘駟馬車。

正是與君一夕話。

果然勝讀十年書。

第三齣 裴興私歎

〔霜天曉角〕〔旦上〕重門靜悄。簾外東風曉。暮雨朝雲怎了。迎新送舊徒勞。〔浣

溪沙〕翡翠屏開繡幄紅。起來無力曉妝慵。錦幃鴛被宿香濃。微雨小庭春寂寂。燕飛鶯語隔簾櫳。

杏花凝恨倚東風。奴家裴興奴是也。生長教坊。粗通文史。雖是烟花門戶。甘心冷淡生涯。自幼曾拜

曹善才爲師。學得幾曲琵琶。無奈叫官身的再無虛日。媽媽又時常嗔怒。這幾日好悶人也。

〔錦纏道〕悶無聊。嘆煙花塵緣未消。粉悴與脂憔。甚時得成就。鳳友鸞交。終日

擺迷魂陣。用被窩中寶刀。只落得按紅牙撥損檀槽。減卻楚宮腰。羞殺人當筵

獻笑。箕箒幾時操也。免得蘭生當道。打疊起目挑與心招。〔丑上〕隔牆須有耳。牕外

豈無人興奴。你在此自言自語。說些什麼。〔旦〕沒有說什麼來。〔丑〕還教不曾說。我都聽見了。你曲

子也不學一學。琵琶也不去彈一彈。到只想着從良。你不要觸犯老娘的性子。

〔普天樂〕我性兒焦心兒躁。怪得我家生俏。家生俏忒恁妝喬。把歌和舞鎮日輕拋。教咱怨着。竟不顧我淒涼門戶。髮蕭騷。〔旦〕我娘。你只愛錢財。竟不顧我終身之事。〔前腔〕恨娘行惟耽鈔。下金鈎把兒郎釣。笑癡兒慾火延燒。好一似精衛填橋。我心中想着。怎教人做得花月之妖。〔丑〕我兒。你今日也要從良。明日也要從良。只道從良有甚好處。你嫁了一個人。未曾入門。大老婆就扯起架子來。除下你的髻髻。勒你跪便跪。拜便拜。又不容老公和你睡。衾寒枕冷。多少淒涼。及至老公千求萬求。求得容你同他一宿。大老婆又忍酸喫醋。聒噪不休。未到天明。就要起身。日裏還要受他幾場嘔氣。要穿沒得穿。要喫沒得喫。要來不得來。要去不得去。要高高不得。要低低不得。才懊悔不聽做娘的說話。卻便難了。你如今快快梳妝接客。若再如此。我一頓皮鞭打得你希爛。定不饒的。

〔古輪臺〕〔旦〕不相饒。遊蜂浪蝶簇花梢。生來嬾去追歡笑。蛙鳴蟬噪。魂繞神勞。怎禁得煙花圈套。便玉軟香溫。珠圍翠繞。算來總是可憐宵。那些個郎才女

貌落便宜獨自煎熬。怕蛾眉翠掃。蟬鬢雲凋。佳人年少。歲月鏡中消。巴不到一鞍一馬遂心苗。

〔尾聲〕市門空倚終難料。墮落風塵淚暗拋。歎于歸無日羞詠桃夭。

柔枝嫩蕊實堪誇。

不逐東風度歲華。

落花有意隨流水。

流水無情戀落花。

第四齣 蠻素餞別

〔一剪梅〕〔貼上〕簾幙重重映曉霞。砌滿飛花。淚灑飛花。〔小旦〕歌慵舞嬾鬢

雲斜。人去天涯。思繞天涯。〔菩薩蠻〕〔貼〕羅幃繡戶悲愁寂。柳絲裊娜春無力。門外草淒淒。送

君聞馬嘶。〔小旦〕釵頭金翡翠。玉臉雙垂淚。花落子規啼。綠牕殘夢迷。〔貼〕奴家喚名樊素。〔小旦〕

奴家喚名小蠻。〔貼〕我兩人出自教坊。頗閑歌舞。向曾在女伴中結爲姊妹。今又蒙白相公娶爲侍

姬。咳。妹子。我自慚媿陋。雖無閉月之容。〔小旦〕姐姐。並事衾裯。幸托小星之列。今早聞得相公赴京

應舉。我和你備一盃別酒餞行。不免請相公出來。

〔菊花新〕〔生上〕翩翩挾策赴京華。賦就凌雲氣可誇。結束遠辭家。有人在綠
牕低亞。你兩個請我出來。有何話說。〔二旦〕今日聞得相公赴京應舉。奴家兩人。特備一盃別酒。與
相公餞行則個。〔生〕生受你。〔貼〕玲瓏。取酒過來。〔小丑上〕一杯別酒。三唱陽關。二位娘子。酒在此。
〔貼小旦遞酒介〕

〔黃鶯兒〕和淚瀉流霞。唱陽關別路賒。眉兒淡了憑誰畫。離心似麻。枕痕轉加。
眼前一刻千金價。願君家。春風得意。看遍上林花。

〔前腔〕〔生〕門外促驕驕。趁東風踏落花。柳絲無奈春愁掛。歸當及瓜。休教憶
咱。盼征途日近長安下。莫咨嗟。你深閨結伴。相對綠牕紗。

〔簇御林〕〔貼小旦〕關河遠。煙樹賒。玉容消。鏡裏花。怕遊絲到處相牽罥。把巫山
夢逐行雲化。萬山遮。匆匆分袂。腸斷已無些。

〔前腔〕〔生〕津亭柳。故苑花。霎時間。天一涯。爲功名兩字添榮掛。管教駟馬高
車駕。漫堪誇。他時畫錦。同汎使星槎。

〔尾聲〕情難盡人轉遐。無奈臨歧淚灑。〔貼小旦〕相公。你早把泥金報喜誇。〔生〕我的行李俱收拾停當了麼。〔貼小旦〕俱交付與白璧了。〔生〕我常穿的青衫。可在裏頭。〔貼小旦〕也在裏頭了。〔生〕既如此。天色將晚。我喚了白璧。竟自出門去了。你兩個自進去罷。〔貼小旦〕相公。途路間關。請自保重。

陌上春風悵別離。

洛陽花事正芳菲。

明朝匹馬東風裏。

正是深閨腸斷時。

第五齣 元白上路

〔園林好〕〔生小生末同上〕請了。怯長途征塵染衣。惜韶春飛花滿裾。遙望見紅樓十里。何處是帝王居。何處是帝王居。

〔江兒水〕春色皇州麗。春風客路迷。萋萋芳草渾無際。聲聲杜宇催春去。〔生〕綠牕無奈春情繫。〔背介〕猶記得閨人私語。〔合〕野店青帘縹緲。共春雲搖曳。〔清江引〕且喜皇都將到矣。日暮雲陰翳。沽酒杏花村。共醉新豐市。今宵幸得

論文侶。

黯黯離情惜解攜。

蕭蕭行李赴京闈。

春風客路頻回首。

野店寒燈共掩扉。

第六齣 元白對策

〔淨丑扮二將軍上〕閭闔初開瑞靄中。丹霞曉日上蒼龍。鳴鞭驚徹廊千步。佩玉聲趨戟五重。自家是殿前金瓜武士。聖上升殿。不免在此侍衛。〔末扮黃門上〕

〔北點絳脣〕鳳闕雲深。螭頭欲散朝霞影。環珮趨蹌。聽樂奏鳴稍靜。花裏宮鶯曉未啼。千牛仗下報班齊。銀袍五百趨龍尾。天子臨軒賜御題。自家黃門官是也。今日聖上臨軒策試諸士。不免在此侍班。道猶未了。諸士早到。〔生小生各持試卷上〕

〔前腔〕瑞靄浮煙。見初陳鹵簿丹墀靜。聖上臨軒。待奏對抒忠愫。〔生〕北望天門拜冕旒。〔小生〕文光遙映五雲浮。〔生〕董生獨對天人策。〔小生〕應慰明王出席求。〔生〕吾輩且喜成名。今日廷試。要各陳所見。以備采納。呀。你看聖駕升殿了。〔末〕廷試諸生。不得近前。就此俯伏。

〔生小生跪介末〕皇帝策問。朕聞之傳曰。先王耀德不觀兵。又曰。誰能去兵。然則君天下者。廢而不用。且涉觀兵之非。資以定功。又幸耀德之美。今河朔兵亂。有言撫安者。有言速討者。其說何居。爾多士詳著于篇。朕將親覽焉。

〔駐馬聽〕如綽如綸。天語傳宣。謹聽聞。今兵興河朔。欲息風塵。須賴臣鄰。先王耀德是何因。于今用武何爲本。顧問諄諄。嘉謀勝算。各宜無隱。

〔駐雲飛〕〔生〕臣對臣聞。敢布芻蕘效惓忱。三鎮相援引。逆節終難隱。嗟。跋扈轉紛紜。皇威當震。講武修文。二者皆明訓。推轂還須任虎臣。

〔前腔〕〔小生〕臣對臣聞。敢竭愚忠答聖恩。河朔方專閫。犯闕軍威損。嗟。國勢此攸存。豈容勿問。速整王師。早把妖氛淨。直搗幽并接陣雲。〔末〕諸士且在午門外

伺候。待下官上殿。將廷試卷傳達。就有玉音傳降。行看姓字驚天下。謾把文章奏日邊。〔下介生〕微之。小弟待奏公車。喜遂成龍之願。名登傑榜。濫叨附驥之榮。何幸何幸。〔小生〕樂天。你終軍年少。賈傅才高。共推臚唱宜先。已卜鰲頭獨占。休得過謙。〔生〕綸音將下。我與你在此拱聽便了。〔末捧榜

文二旦宮人捧冠帶上

〔滴溜子〕日華動。日華動。玉闕臚傳。宮袍爛。宮袍爛。綠羅新翦。彷彿雲梯月殿。春光醉九重。蓬瀛妙選。手捧綸音。丹陛傳宣。〔末〕皇帝有旨。白居易元稹俱賜進士及第。餘皆賜進士出身。白居易授諫院左拾遺兼中書舍人。元稹授祕書省祕書郎。袍笏冠帶。就此佩服。鴻臚寺具鼓樂。就撤御前鹵簿。道送歸第。謝恩。〔生小生〕萬歲萬歲萬萬歲。〔末〕諸進士退班。芳名通禁籍。詞賦重凌雲。〔同一宮人下生小生出朝介衆從人上〕

〔前腔〕這綸綍。這綸綍。頌來自天。這袍笏。這袍笏。恩榮非淺。頃刻雲蒸霞變。神魚欲化龍。朱衣頭點。絕勝登瀛。簇擁似僊。〔衆〕儀仗已備。請爺上馬。〔生小生〕請了。

〔山花子〕玉驄蹀躞天衢穩。煖融融。花柳爭新。看奎躔光搖紫宸。獻甘泉奏捷雄文。遇明時仰荷湛恩。聲名一日天下聞。紛紛時彥屬後塵。願展丹葵不負臣鄰。〔並下〕

第七齣 郊遊訪興

〔菊花新〕〔外〕劉禹錫未攜酒歸隨上。六街歌舞馬頭塵。最喜連羈是故人。郊外好尋春。載酒且期歡飲。玄都觀裏桃千樹。盡是劉郎去後栽。種桃道士歸何處。前度劉郎今又來。自家劉禹錫便是。前日朝門上放榜。喜得故人白樂天元微之俱已及第。如今遊街將畢。分付院子備些酒肴。與他到東郊游樂。一展契闊之情。一伸慶賀之意。卻不是好叫院子快備酒肴。打點隨我郊外賞春。〔末〕理會得。〔外〕看元白二位老爺到來。便邀他下馬。〔生〕小生騎馬引從人上。

〔香遍滿〕彤墀拜舞踏香塵。看遍街頭萬戶春。紛紛俱是冶遊人。轉覺皇都氣象新。〔末〕劉老爺在此奉候。請二位老爺下馬。〔相見介外〕恭承高第。殊慰下情。聊具酒餚。屈至東郊游賞。萬勿見拒。〔生〕既蒙雅意。敢不追隨。就此前去。

〔宜春令〕花光豔。草色新。且停驂向仙源問津。平橋曲徑。杜陵韋曲相將近。鞦韆外燕蹴紅英。粉牆邊鶯遷綠蔭。〔合〕喜如今滿前春色。四郊無警。

〔前腔〕〔小生〕尋芳侶。拾翠頻。愛香堤平鋪繡茵。帝城相映。龍樓咫尺天顏近。覩村莊四野齊民。數田疇幾家同井。〔合前〕

〔前腔〕〔外〕催黃鳥。轉綠蘋。出郊圻。暫離紫宸。攜壺挈伴。絲鞭齊拂。垂楊影。向金閨。侍從經旬。解羅襪。暫息勞頓。〔合前生〕請問二兄。既要飲酒。須尋個人家。纔覺方便。

〔小生〕正是。〔外〕此間有個妓者。喚名裴興奴。不惟絕色。況且琵琶是營妓中第一手。小弟奉陪。同到他家去如何。〔生小生〕如此甚好。請就同行。〔生〕散步到江皋。〔小生〕指點青樓小。〔外〕爲覓如花貌。〔合〕滿徑花枝繞。〔末〕此間正是裴興奴家了。〔外〕可敲門。〔末敲介丑上〕柳暗聞啼鵲。花深共掩門。是誰。〔開門介〕呀。原來是列位老爺。列位老爺請坐。待我喚女兒出來。興奴。有客在此。快來。〔旦上〕來了。

〔玩仙燈〕脂粉慵調。幽恨縈懷抱。聽花外黃鸝聲。巧母親。那個在此。〔丑〕我兒過來。見了三位老爺。〔相見介旦〕呀。劉老爺。爲何一向不見下顧。〔外〕連日有事。不會來看你。〔旦背云〕此二位決非凡品。我爲何不會識面。〔外〕興奴這般識人。可要對你說。那一位是做連昌宮詞的元微之。這一位是做長恨歌的白樂天。〔旦〕久慕久慕。娘。你進去另煮好茶來喫。今日的客不比尋常。〔丑背白〕曉得了。看來也不像使錢的。想我女兒有些眼裏火了。〔下生〕方纔走得有些熱。待我脫